

SAMÞYKKT

um bann við lausagöngu hrossa í Rangárvallahreppi.

1. gr.

Hreppsnefnd Rangárvallahrepps hefur samþykkt að lausaganga hrossa sé bönnuð allt árið og er eigendum skylt að hafa hross í vörslum.

2. gr.

Samþykkt þessi sem sett er með heimild í 5. gr. laga nr. 46/1991 um búfjárhald, forðagæslu o.fl., öðlast þegar gildi og gildir fyrir allan hreppinn. Samþykkt þessi kemur í stað auglýsingar frá 10. maí 1987.

Landbúnaðarráðuneytinu, 14. mars 2000.

Guðni Ágústsson.

Ingibjörg Ólöf Vilhjálmsdóttir.

Nr. 183

9. mars 2000

AUGLÝSING

um staðfestingu á breytingu á aðalskipulagi Kópavogs, endurvinnslustöð Sorpu.

Samkvæmt skipulags- og byggingarlögum nr. 73/1997 hefur ráðherra þann 9. mars 2000 staðfest breytingu á aðalskipulagi Kópavogs 1992 - 2012, frá 29. apríl 1994.

Breytingin felst í að opið svæði við Dalveg verður iðnaðarsvæði þar sem starfrækt verður móttökustöð Sorpu fyrir úrgang.

Uppdrátturinn hefur hlotið þá meðferð sem skipulags- og byggingarlög mæla fyrir um og samþykki bæjarstjórnar Kópavogs. Skipulagsstofnun hefur afgreitt erindið til staðfestingar.

Umhverfissráðuneytinu, 9. mars 2000.

Siv Friðleifsdóttir.

Hrafn Hallgrímsson.

Nr. 184

15. mars 2000

REGLUR

um mælieiningarverð.

Gildissvið.

1. gr.

Reglur þessar taka til fyrirtækja sem selja vörur til neytenda og kveða á um skyldu til að verðmerkja vörur með mælieiningarverði í því skyni að bæta upplýsingar til neytenda og auðvelda verðsamanburð.

Vörur sem skylt er að verðmerkja samkvæmt reglum um verðmerkingar skal einnig verðmerkja með mælieiningarverði hvar sem þær eru til sýnis - t.d. vörur í búðargluggum, sýningarkössum, í auglýsingum eða á annan hátt. Þegar um er að ræða vörur sem eru seldar í lausri vigt nægir að tilgreina söluverðið.

Reglur Samkeppnisstofnunar um verðmerkingar nr. 580/1998 gilda einnig um mælieiningarverð.

2. gr.

Reglur þessar gilda ekki um:

- matvæli sem seld eru í gisti-, veitinga- og kaffihúsum, sjúkrahúsum og mótuneytum,
- samsetta vöru, t.d. tilbúna rétti, eða þegar fleiri en ein tegund vöru er seld í sömu pakkningu,
- vörur aðrar en matvæli sem almennt eru seldar í stykkjatali,
- vörur sem látnar eru í té í tengslum við þjónustu,
- uppboðssölu,
- vörur sem eru undir 50 g að þyngd eða 50 ml að rúmmáli,
- grænmeti sem er ræktað og selt í potti.

Orðskýringar.

3. gr.

Merking orða í reglum þessum er sem hér segir:

Mælieiningarverð: Endanlegt verð, að meðtöldum virðisaukaskatti og öllum öðrum sköttum, fyrir lítra ef vara er seld eftir rúmmáli, kílógramm ef vara er seld miðað við þyngd, metra ef vara er seld miðað við lengd, fermetra ef vara er seld miðað við flatarmál.

Söluverð: Endanlegt verð fyrir hverja einingu vöru eða tiltekið magn vöru að meðtöldum virðisaukaskatti og öllum öðrum sköttum.

Matvæli: Um skilgreiningu hugtaksins er vísað til laga um matvæli nr. 93/1995.

Þjónusta: Hér er átt við hvers konar fyrirgreiðslu, vinnu eða þjónustu sem veitt er gegn endurgjaldi, nema launaða vinnu í þjónustu annarra.

Vörur sem seldar eru í stykkjatali: Vörur sem ekki er unnt að hluta sundur eða skipta án þess að breyta eðli þeirra eða eiginleikum.

Vörur seldar í lausri vigt: Vörur sem ekki eru í neytendaumbúðum og eru mældar eða vegnar í viðurvist neytandans.

Mælieiningarverð.

4. gr.

Mælieiningarverð skal gefið upp miðað við hvern lítra matvæla, sem seld eru miðað við rúmmál og hvert kíló matvæla sem seld eru miðað við þyngd.

Mælieiningarverð vara annarra en matvæla, skal gefið upp eftir því sem við á miðað við kíló, lítra, metra eða fermetra. Þegar mælieiningarverð vöru þjónar ekki tilgangi miðað við framangreindar mælieiningar, skal gefa upp mælieiningarverð miðað við stykki þar sem það á við, svo sem á bleium, pappírsservíettum, salernispappír o.s.frv.

Mælieiningarverð skal gefið upp miðað við nettóinnihald, þ.e. vara að frádragnum umbúðum.

Þegar matvæli eru í vökva svo sem vatni, legi eða soði skal mælieiningarverð gefið upp miðað við þyngd í föstu formi, þ.e. þyngd fyrir utan vökva.

Mælieiningarverð vöru sem síðar verður þynnt út með vökva (s.s. vatni) skal gefið upp miðað við vöruna tilbúna til notkunar. Í því sambandi skal farið að fyrirmælum framleiðanda.

Útreikningur á mælieiningarverði.

5. gr.

Mælieiningarverð er reiknað á eftirfarandi hátt:

1. Smásöluverð _____
Miðað við þyngdar- eða rúmmálseiningu
2. Matvæli sem eru í vatni, legi, soði eða þ.h.:
Smásöluverð _____
Miðað við þyngdareiningu án vökva
3. Vara sem þarfnast vökva, krydds eða annars sem hefur lítil eða engin áhrif á endanlegt verð vörunnar:
Smásöluverð _____
Miðað við þyngdar- eða rúmmálseiningu þegar varan er tilbúin til notkunar

Staðsetning merkinga á mælieiningarverði.

6. gr.

Mælieiningarverð skal setja á vöruna sjálfa, á viðfestan miða eða á umbúðir. Þegar framangreint er ekki hægt má verðmerkja með hillumerki, skilti eða verðlista enda sé ávallt tryggt að neytendur eigi auðvelt með að sjá verðið. Mælieiningarverð skal vera þannig staðsett að greinilegt sé til hvaða vöru það vísar.

Undanþága.

7. gr.

Samkeppnisstofnun getur, í sérstökum tilfellum, veitt undanþágu frá skyldu að verðmerkja með mælieiningarverði. Þetta á einkum við þegar tilgreining mælieiningarverðs:
- er líkleg til að fela í sér óhóflega byrði fyrir smásölurekstur,
- er illframkvæmanleg,
- snýr að vöru sem hefur lítið upplýsingagildi fyrir neytendur, t.d. vörur sem keyptar eru sjaldan og í afar litlu magni.

Viðurlög.

8. gr.

Ef brotið er í bága við reglur þessar varðar það viðurlögum samkvæmt 57. gr. samkeppnislaga nr. 8/1993.

Gildistaka.

9. gr.

Reglur þessar öðlast gildi við birtingu og koma í stað reglna nr. 578/1994 sem falla jafnframt úr gildi.

Reglur þessar eru settar með heimild í 31. og 32. gr. samkeppnislaga.

Með reglunum* er Ísland að uppfylla skyldur sínar samkvæmt samningnum um Evrópska efnahagssvæðið (EES).

* Reglurnar taka mið af tilskipun ráðsins um samræmingu á lögum aðildarríkjanna um neytendavernd að því er varðar upplýsingar um verð á vöru sem er boðin neytendum nr. 98/6/EB.

Samkeppnisstofnun, 15. mars 2000.

Georg Ólafsson.

Kristín Færseth.